

三怡堂叢書

豫變紀畧

五

三怡堂集書

卷之四

五

豫變紀畧卷四

崇正十五年
正月至六月

三怡堂叢書

壬午

崇正十五年春正月辛未朔懷慶地震

時賊圍開封攻甚急守亦甚嚴雖張許之守睢陽不如也砲石如雨中輒糜爛賊患之乃驅衆婦人裸而立於城下以厭之謂之陰門陣城上之砲皆倒洩而不鳴城中將吏乃急命諸軍裸立而燃砲謂之陽門陣以破之賊之砲石亦倒洩而不鳴異哉陣名自蚩尤黃巢以來攻戰多矣未嘗聞此也壬申賊伐柏作臺長十丈餘廣五丈餘高可三丈上容百餘人置砲攻城城上急立長柏木三如鼎足懸大砲其上望柏臺擊之連斃數賊而

城上方木臺亦高出柏臺三二丈燃砲俯擊柏臺柏臺
之賊皆死癸酉官兵三千人降賊賊恐其爲內應誘至
老營點名皆縛而殺之擲蓮池中賊頭目有李狗皮者
攻北門賊怒其攻之不力也杖四十賊中無杖刑副爲
重斬次之斷手又次之刳劓爲輕狗皮獨得杖幸也甲
戌奪賊洞五十餘處賊挖城洞我兵從城上穿下透逐
賊出而據之因穴大小以兵守之賊復來不能入矣丁
丑又奪一巨洞賊於曹門心字樓下城頭依二十
八宿設樓挖一
巨洞我兵亦穿透與之爭賊在洞中死拒我兵莫能入
巡按初懸千金賞未有應者復硃書有能奪此洞者賞

二千金併銀置洞口上有朱呈祥者領十餘人先用柴懸入洞口之半加烘藥爇之隨積薪填燒極熱賊不能存乃灌水百餘石親帶短刀跳入遂得此洞可容兵五六十人前後凡三十六洞俱以兵守之賊竭十五晝夜力盡爲我用於是人心愈奮戊寅雪夜襲賊營巡按令總社選奇兵五百由水門銜枚出約以暗號奇兵出濠外分數股砍入賊營賊驚起奇兵卽退走濠內其追躡者至各洞兵齊出斷其歸路奇兵復回合殺斬首七百八十三級是夜三更大雪中巡按與推官立城頭調度渾身雪厚寸許不自覺是役也二賊合攻以爲城旦夕

可破而汴人効死不貳攻愈猛守亦愈堅半月依然不動也賊大怒使數十賊持刀驅賊掘城洞兵在內拒之莫敢近其外則懸樓上磚石如雨不得已走回濠邊持刀賊乃盡殺之屢驅屢殺如是者數日至壬午賊益併力急攻總兵陳永福守大洞口連日力戰賊不能近是日忽列大砲百餘枚齊燃擊城城被炮傾頽如坂步賊隨砲登城城上砲忽倒洩三五枚賊之先登者百餘人執旗而闕於城中永福不顧也乃置一大砲於胯下命左右曰速點速點忠臣不怕死既燃竟不倒洩於是萬砲齊燃賊皆糜爛遂成一條血坂矣而其續登者復如

蟻永福以大車實土繫綆以繫之車砲間施無停晷自
免胄率衆執巨槌如堵而翼其闕我兵中傷亦多其戰
愈厲賊勢少却城上急以水覆之其傾頽處須臾皆冰
賊竟不能上矣乃遣兵分道追勦賊之先登者卽以其
肉食饑民頃刻而盡稍間卽添築城墻七層翼日城完
如故

癸未賊放地雷自斃其卒萬餘人 賊於東北角鑿城作
一大穴約廣丈餘長可十餘丈以布囊運火藥於其中
無慮數十石置藥線三長可四五丈大如斗是日騎賊
千餘俱勒馬遼邊步賊無數鴈行列如將戰然已刻點

火烟一起黑迷如深夜其聲之震如天崩地裂大磨百餘片磚石無算皆飛舞半空中碎落城外二三里濠邊馬步賊一時皆爲齏粉矣間有人死而馬自驚逸數里者守陣卒未傷一人城牆裏半壁僅厚尺許兀兀峙立如故也賊於是始有退志甲申賊攻稍緩唯砲聲不絕有遠入城中十里者十五日乙酉流賊解圍自西北而東南揚塵蔽日其營盤內外約廣八九里長二十餘里以婆塔寺爲聚糧所糧深數尺營中所遺牛驢頭足腸肺間以死屍相撐拄腥穢縱橫不可逼視此所謂流賊二犯汴梁也闖曹合攻計其精賊不過三萬脇從約三

四十萬攻城死者幾半二賊至朱仙鎮點閱銳精除死
亡外重傷者三千八百七十三人俱以方几仰昇而去
總兵左良玉棄賊於襄城 良玉自杞縣二日追至鄆城
白沙河及之連戰數日屢勝之已而賊西向襄城良玉
亦東走是時良玉兵號十萬賊又畏其名汴圍之解蓋
聞左自東來也自是不畏左兵矣初賊圍汴時左帥駐
汝南不進撫按馳書促之云將軍望隆方召威震華夷
國家固倚之爲長城者也今狂賊圍汴危於累卵雄師
密邇未覩旌麾在將軍胸中自有成竹諒非腐儒可測
但不知賊倘陷汴將軍何以謝朝廷耳至正月初五日

抵雍丘復書云我兵單弱未能辦賊若遽臨城一戰賊
得我淺深汴益無所恃今暫屯杞縣以分賊勢姑爲牽
制之計以待機會及賊南走始追至鄆城一戰而去

懷慶地震

河北叛將任國奇掠水冶鎮 林縣百戶陳鼎赴敵被執
驅至城下以兵隨其後欲給令開門納之而因以襲城
鼎厲聲罵曰吾恨不手刃若屬肯賣城乎大呼曰城上
宜戒嚴勿爲賊所襲賊怒殺之縣以有備獲全

流賊破襄城訓導張信死之殺知縣及二教官 賊旦至
知縣曹陝西舉人也誓不爲賊屈左右力勸之曹乃出

城四十里迎賊賊惡而殺之遂進而圍城攻之急內無
知縣矣訓導張信率衆固守及城陷被執大罵不屈賊
怒割其舌猶手探舌血書翦賊二字賊益怒乃殺之懷
中露片紙有厲鬼殺賊之句城破之明日有二教官入
賊營謁賊帥賊帥問曰昨日何不來二人相視不能對
乃併殺之嗚呼此二人者何以見張訓導於地下乎
諸生李光閭手持白扇懷抱文文山集投於儒學泮水
中而死死矣手扇猶浮於水面上有贊曰余無官守而
甘一死非慕嘉名聊存廉恥嗚呼文山千秋知己泮水
洋洋嫵彼柴市

流賊李自成復陷襄城總督汪喬年死之 喬年字歲星
浙江遂安人天啟壬戌進士仕至總督三邊兵部右侍
郎都察院右僉都御史歷官二十年人未有敢干以私
者至是朝議以喬年督師討賊既受命即率秦兵三萬
人出關甫至洛自成已陷襄城而東圍左良玉於鄆城
喬年乃留步卒於洛而以二萬騎兼程而進益襄去鄆
僅百里而左又驍帥故欲出不意前後夾擊之也時襄
城新破東壓賊境總兵鄭嘉棟請假公節鉞先行以覘
向背遂同邑舉人張永祺爲前鋒至則襄人士焚香道
左哭聲震天擁鄭帥馬至格不能行鄭帥旋報命曰襄

人忠義之氣可用也時大軍已抵西郭外三里堡安營
喬年遂挺身將數十騎入城襄人環泣曰喪亂餘生不
期再見天日因畫賊之虛實喬年喜曰賊在吾目中矣
吾當爲若等掃蕩之襄人進食喬年曰吾軍未舉火雖
欲獨食義不忍遂揮馬出漏下二鼓抵營集諸帥於幕
分賀人龍鄭嘉棟牛成虎三帥爲三路駐東城四十里
與左帥遙爲聲援翼日襄人請大軍入屯城中頃之哨
者報賊至總兵張國欽戰死賀鄭牛三帥皆不戰而走
左右諫曰大勢已去宜姑左次以圖再舉坐守孤城無
益也喬年怒叱之急召諸將校並邑諸生誓於城隍神

曰遭逢喪亂正臣子戮力之時誓死報國願有同心若等勉旃殲賊後吾當奏於朝官以不次也衆皆感激泣下曰敢不効死喬年遂擻然擐甲率衆登陴爰命張總兵某守西城諸生何謙佐之賈副將某守南城諸生張和聲佐之馬副將某守東城諸生井良田佐之黨參將威守北城諸生張琇佐之而喬年自將所部當賊衝以監紀同知孫兆祿叅謀議諸生劉漢臣耿應張爲軍門贊畫官時二月十三日也賊至遣健卒持攻具蜂擁城下鑿城爲穴置火藥其中燃之城卽崩其法甚烈名曰放礮

音崩去聲

喬年命城上亦隨處鑿穴以利刃刺之殺死

者甚衆賊又負門板向城城上以巨石擊之應手而倒
賊死者數千人其斬死射死砲擊死者不計其數賊益
忿曰自吾起事所向無敵胡爾小縣傷我如許頭目自
此攻愈力而守亦愈堅如是者兩晝夜時天雨雪喬年
憂形於色漢臣進曰賊鋒挫矣出奇制勝正在此時寧
以雨雪自介壯懷乎喬年笑曰微子言幾亂吾志時賊
攻城之西南隅崩陷者以荆固實土築而完之守如故
賊覘大燾所在礮石叢擊雉堞盡毀喬年神色不變指
麾自如左右褰其衣曰砲利甚請就雉堞堅厚處喬年
張目曰爾怕死乎吾不怕死也如此者又一日賊忽撤

其西南隅攻壘蓋以兵法圍城必闕一隅欲給我逸出而襲之也或曰賊怯矣宜乘其懈且戰且走喬年曰頭可斷身不可走吾誓與此城共存亡矣敢言走者斬卽命取薪車填門以堅城守而待援初自成之撤圍西來也良玉已悉衆東走矣而襄人猶以爲望至十七日矢盡援絕力不能支城遂陷喬年猶驅兵巷戰手刃二潰卒殺三梟賊大聲呼曰臣力竭矣不能殺賊而反爲賊所敗死固吾所也北望稽首急自刎不殊而被執見闖賊於城北之韓家庄左右喝曰跪喬年厲聲曰吾朝廷大臣奉命剿汝恨不能生啗汝肉卽死猶當爲厲鬼殺

汝以報國而又誰跪賊大怒遂斷其舌擊其齒猶以血
噴賊至死啞啞罵不絕口監紀同知孫兆祿總兵張某
副將馬某叅將黨威材官李可從縣丞某皆死焉賈副
將軍騎突南門而出格賊賊以梟騎數十追之卒無一
人敢逼之百步內者竟去賊深恨諸生爲喬年守城悉
取而剗剔之凡百九十人又購舉人張永祺不獲殺其
族人九家當是時全軍覆沒闔城屠戮至十九日拔營
西去贊畫諸生劉漢臣遇害未殊乃同邑人收喬年屍
藁葬於殉難處厥後其孫幼些來求骸骨啟其瘞面目
如生初喬年之受命討賊也發李自成先塚得小蛇卽